



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Karnataka nung Congress party sorkar arutsü: Rahul Gandhi

Man United nungi asayar Martinez Season tepeyong masayatetsü



VOL. XX NO. 184 (ADOK 184) DIMAPUR TENTONÜ (MONDAY)

RONGCHII (APRIL) 17, 2023

₹ 5.00

## DNSU-i NSF pusema nungiter

**Dimapur, April 16, 2023 (TYO):** Naga Students' Federation-i Nagaland Staff Selection Board(NSSB) indang viva-voce marks atema takhangba agütsüba Dimapur Naga Students' Union (DNSU)-i pusema nungiter ta metetdaksüogo.

Kaketshirtem aser lanurtem taginüba nung ajemdaker DNSU-

i NSF pusema nungiter aser parnoki lungkak aitba nung yaritepsü, ta DNSU-i sangdong ka nung metetdaksü.

NSSB-i ketdangsüa agiba Combined Staff Recruitment Examination 2022 Viva-Voce atema candidate temi April 17 & 18, 2023 anogotem interview nung madentsü mepishir ta parnokisa ashi.

## India nung nisung 10,093 dak Covid-19 putet

**New Delhi, April 16, 2023 (Agencies):** Deobarnep 8:00 ako tashi tesüüba ghonda 24 tsüngda India nung nisung 10,093 dak coronavirus putetogo ta Union Health Ministry-i ashi.

Kasa mapang Covid agi nisung 23 asü aser parnok züngsema tasür ajak agi nisung 5,31,114 kumogo.

Delhi nung nisung 5 asü, Kerala

nung pezü, Chattisgarh o Rajasthan nung asemsem, Karnataka o Maharashtra nung anana aser Haryana, Odisha, Tamil Nadu o Uttarakhand nung kaka asü.

Tanep tashi nung India nung nisung 4.47 crore (4,48,18,115) dak Covid putetogo. Külen, nisung 4,42,29,459 tashi taneptsü nguogo, ta Union Health Ministry-isa metetdaksü.

## PM Modi-i ochimashi atema süoki ia mebilemer: Satya Pal Malik

**New Delhi, April 16, 2023 (Agencies):** Jammu & Kashmir state nung Governor tatembangba inyaksang Satya Pal Malik-i olen kar jembiba ajanga Modi'er sorkar, Bharatiya Janata Party (BJP) aser J&K asoshi ashishitep ken o kar adoktsü tensa ka ajurua lir.

"Prime Minister-i ochimashi atema kecha mashir" ta Malik-i ashi. February 2019 nung kiralongrartemi Pulwama amakdang Malik governor inyaka liasü.

"Prime minister-i Kashmir indang osang tejangja memetet aser pai kü dang Union home ministry-i metokmeperi inyakba indang mejembitsü ashi. Union home ministry-i shitak meinyakba ajanga February 2019 nung Pulwama nung sepaitem taküm sama" ta Malik-i ashi.

"Pulwama nung Central Reserve Police Force convoy amakbaji Indian system majungba ajanga atalokba liasü. Iba ya CRPF aser home ministry ajanga teinyaktsü shitak meinyakba ajanga liasü" ta paisa ashi.

Iba mapang Rajnath Singh home minister liasü. CRPF-i jawan tem anir aotsü atema tayimtsü meshidang Union home ministry-i memulungba aser lenmang timi mereprangba indang Malik-isa metetdaksü.

Pulwama lendong atalokba sülen pai PM Modi den item metokmeperi ajak ashi saka PM-i pa dang ola madoktsü aser shinga dang mashitsü tetuyuba agütsü ta Malik-isa temai adoka ashi.

NSAAjit Doval-ia pa dang ola madoktsü aser kecha mejembitsü ashi. Pakistan nem tai tongloksütsü aser iba ajanga sorkar o BJP-i election nung tajangzük angutsü atema parnoki pa dang ola madoktsü ashi ta

Malik-isa metetdaksü. Pulwama lendong nung intelligence tamakok tuluka liasü kechiyong RDX explosives seret 300 abenba gariji Pakistan nungi aru aser anogo 10-15 tashi Jammu and Kashmir nung senzü ta paisa ashi.

Malik-i J&K nung governor inyakdang BJP-RSS lennir Ram Madhav-i pa den ajurutepe hydro-electric scheme aser Reliance insurance scheme ka agizüktsü ashi saka pai memulungba indang olen ka ashi. "Ni aibelen mapa kecha meinyaktsü" ta pai Madhav dang ashi saka Madhav-i pa den tanaben ajurutepe tebilemba melendaktsütsü merang saka pai tashi manga, ta Malik-isa ashi.

"Scheme anaji agizükra ni Rs 300 crores ajangtetsü ta nisung kari kü dang ashi" ta paisa shisem.

Prime minister Modi-i Kashmir indang osang junga memetet. Jammu & Kashmir nungi state agienba ya aibelen ka liasü aser tananen state kümdaktsütsüla, ta Malik-isa ashi.

Prime minister-i ochimashi atema süoki ia mebilemer. August 2020 ni Goa nung governor nungi agien aser Meghalaya-i yok. Ni aiben prime minister dang ochimashi maparen indang osang lemsatop saka sorkari item osang magizük, ta paisa metetdaksü.

PM den külemi inyaktertemi ochimashi inyaker aser parnoki aiben PMO tenüng amshir. Item ajak ya ni Modi dang ashi saka pai hao ta mali toktsü, ta Malik-isa ashi.

"President Droupadi Murmu-i appointments agütsüba ajak ya PMO-i lemtetba dang lir. Ni governor inyakdang president-i kü nem appointment ka agütsü saka ni Rashtrapati Bhavan-i aodang iba appointment ji athi" ta Malik-isa ashi.

## CBI-i Arvind Kejriwal dang tasüngdangba 56 asüngdang

**New Delhi, April 16, 2023 (Agencies):** Deobarnü Central Bureau of Investigation (CBI)-i ghonda 9 jungnüa Delhi Chief Minister Arvind Kejriwal dang liquor policy ken o atema asüngdangyaogo.

Iba policy yangluba nung ochimashi liasü aser liquor lobby ka ajangzüktsü atema yanglu ta bushisüandangertemi ashir aser iba atema CM Kejriwal dang asüngdangya.

"CBI-i kü dang tasüngdangba 56 asüngdang. Ajakji taila lir. Iba ken o ya taila. Parnok ket nung onok anema kuli ka danga mali ta ni metetogo" ta Kejriwal-i CBI headquarters nungi aluba sülen osangbener dang ashi.

Kejriwal den deputy chief minister inyaka alisang Manish Sisodia-i excise portfolio bona liasü aser taküm March ita CBI-i pa apu.

"CBI-i 2020 nungi tenzükter ajak asüngdang. Iba küm liquor policy yanglu aser kasa küm nungsa anen" ta Kejriwal-isa ashi.

Aam Aadmi Party (AAP) sorkari Hombarnü Delhi assembly indang special session ka jazüka lir aser idangji ajak

jembitsü, ta paisa metetdaksü.

"Iba liquor policy ken o ya tiyazü lir aser otsü yanglushiba ka lir. Ochishiba ya onok tangatetba lir. Onoki taküm bendanga agütsütsü mulunga lir saka ochishiba nungi marakzüksü. Parnoki onok tenüng menüktsütsü atema iba mapa inyaker. Onok national party ka kumogo aser iba jagi parnoki iba mapa inyaker" ta Kejriwal-isa ashi.

CBI-i Kejriwal dang asüngdangyaba mapang AAP-i Deobar nikongdang lennir tejentem rondak senden ka ayongzuka amen. CBI-i Kejriwal aputsü akok ta tebilemstü abenba atema parnok senden amen.

AAP Delhi convener Gopal Rai-i tanü nikongdang 5:00 ako nung rondak senden ayonga amen aser idangji AAP national secretary Pankaj Gupta, Delhi mayor Shelly Oberoi aser deputy mayor Aale Iqbal nungertem aden.

Deobarnü Delhi nung CBI office anasa lungkak aitba atema Delhi Police-i Raghav Chadha aser Sanjay Singh na dena AAP lennirtem apu. Ajisüaka, Kejriwal

CBI office nungi kimai aluba sülen parnok chiok.

"BJP-i Kejriwal phobia ajanga timtemer. BJP-i Kejriwal tsübuba ajanga iba tashi mapa inyaker. Iba ya lapi mapa ka lir. Onoki jail-i aotsü metsübur" ta Chadha-i ashi.

Sisodia den secretary inyaker kati bushisüandangertem dang March 2021 nung Kejriwal'er kidang Sisodia-i pa nem draft liquor policy agütsüba shiogo ta CBI-i ashir.

Iba nisung ya C Arvind lir aser pai magistrate ka tsüngdang iba kuli agütsüba ajanga okadaki kuli ka asütsü melar. Kejriwal-i iba senden indang kechi ashir ta metetstü atema CBI-i asüngdangya asü.

Taoba Lieutenant Governor Anil Baijal-i bushisüandang ka asütsü tetuyuba agütsüba sülen Delhi sorkari excise policy agizüka liasü. Iba excise policy ya anaben tashi athiba sülen sorkari agizük aser CBI-i kechiba iba amaji inyak ta asüba metetnür.

Delhi sorkari liquor policy tasen tenzükter küm ka majungdang July 2022 nung agien aser liquor policy tejenba beshitsü tenzük.

## Nagaland sorkari Mother Zaputuo-o Angami Welfare Fund tenzükter



**Kohima, April 16, 2023 (TY):** Kohima Orphanage & Destitute Home (KODH) founder asür Zaputuo-ü Angami nungtem nung students' welfare fund ka tenzüktsü ta Nagaland sorkari metetdaksüogo.

KODH indang hon jubilee benjungmong nung Chief Minister indang Advisor aser Investment & Development Authority of Nagaland (IDAN) Chairman Abu Metha-i iba osang metetdaksü.

Asür Zaputuo-ü Angami aser teyaritepertemi lajartem pei tanur ama anepaluba atema tenüngsang agütsür ta pai ashi.

Abu Metha-isa tanurtem dang alima tayongzükbatem koktettsü aser pei tajungtiba agütsütsü ayongzük. Paisa tanurtem dang lokti nung shilem tajung agitsü ayongzük.

"KODH küm 50 ajungba benjung ya Naga loktilibai tanurtem kodaser iba nung alitsüsa aküm ta asüba meyipa reprangdangtsüba mapang ka lir. Asenoki lajartem asoshi kechi

inyaktsü ta shisadangtsüla" ta paisa ashi.

State sorkari Mother Zaputuo-ü Angami Welfare Fund tentetstü aser iba welfare fund ya asüng nungi mapa kuma tenzüktsü ta Advisor Metha-isa metetdaksü.

Kohima Orphanage & Destitute Home (KODH) nungsa yakta computer institute ka amenoktsü, ta paisa shisem.

"Tanü shisaliok ya kaket azüngba aser math o science inyakba dang lir ajisüaka tarutsü putu atema modern technology hadirtem amshiyim metetstüla. Asenoki tanurtem nem modern education aser technology tesayuba agütsütsü kechiyong parnok nem quality education magütsüra parnoki kecha mesütetstü" ta Metha-isa ashi.

School Education Department ajanga iba temeket nung aliba sorkar school tajungba akümtsü. Tarutsü nung iba tesem dang orphanage masü saka centre of excellence ka akümtsü, ta paisa ashi.

1973 küm KODH lapokba

sülen tanur 700 tema anepalua aruogo. Iba ki ya Kohima-Dimapur lenmang anasa Seithogie, T Khel Model village nung lir.

Iba mapang Zaputuo-ü Angami ya government nurse ka liasü aser 1973 küm lai tanur ka anepalua Home ya lapok. La ya 2011 küm alima nungi pila.

Tanü sentong nung KODH nung aliba tanur 90-i Jubilee Choir shilem agia ken aten aser parnoki 'Ama Zaputuo-ü' nem tetushi agüja ken ka aten.

Managing Director Old Age Home Kohima Neibanuo Z. Angami-i asür Zaputuo-ü Angami ajanga lajartem atema Home ketdangsüa arudang timtem jenti ajuruba osang lemsatop.

Tang tashi nung KODH nung anepalurtem doctor, saisaponger, state police aser Assam Rifles sepaitem kumogo, ta Neibanuo-isa ashi.

Tang KODH nung tanur 90 lir aser parnok rongnung kinü tanur nungi tenzükter degree o technical courses azüngertem dena lir.

## Assam Rifles temi Mkg nung NSCN (IM) züngsem ana apu



**Kohima, Rongchii/April 16 (TYO):** Assam Rifles temi general area New Camp, Mokokchung nung NSCN (IM) züngsem ana April 14, 2023 nü apu.

NSCN (IM) züngsemtem Mokokchung - Mariani Road nung jaja civilian tem amokmerena aser tashiyim amshia senotsü meshiba osang tejangja angazükba nung

ajemdaker operation ka tenzüka Mobile Vehicle Check Post ka amenok, ta sangdong ka ajanga ashi.

Iba mapang Assam Rifles temi registration number AS 01 X 6465 aliba Maruti Alto gari ka soitba mapang yangji mena alirtem jena oa khen asoshi yanglua aliba azüki ka nung jenok.

Iba tesem ya lungbanger ki ya mita aodang NSCN (IM)

züngsem Self Styled Sergeant Major Imkongtiba aser Self Styled Sergeant Major Phamching den prangbong ana aser injang kar pua liasü, ta sangdong ajanga ashi.

Iba ken o maneni bushisüngdangtsü asoshi pua alisang NSCN (IM) züngsem ana den tena ket nung aliba hadir tem Mokokchung Police Station-I nem amoktsüogo, ta sangdong ajangasa ashi.

## NAAC Peer Team-i C-Edge College semdang

**Dimapur, Rongchii/April 16 (TYO):** National Assessment and Accreditation Council (NAAC) Peer Team, kobai shisaliok inyakym asadanga reju tem nem jenjang agütsür, parnoki 2nd Cycle of Accreditation atema April 12 aser 13, 2023 anogotem C-Edge College semdanga liasü.

Iba NAAC Peer Team nung Mohan Sukhadia University, Rajasthan indang taoba Vice Chancellor Prof. JP Sharma mendenpuba; Alagappa University, Karaikudi, Tamil Nadu nung taoba Registrar aser Dean (Management), Prof. V. Manickavasagam ya Member Coordinator aser Dravidian University, Kuppam Andhra Pradesh nung Professor of Adult Education and Hrd, Prof. GL Reddy ya züngsem alitsü.

Parnok College tonga arudang pela agizükba sülen

mezüngbuba assessment inyakym tenzüka Principal, Dr. Chubatola Aier-i presentation agüja liasü.

Iba mapang lai college puti otsü, nükla aser mangdang, academic aser college indang ki o jen, tarutsü nung terenlok asoshi sentong balala indang tejangja lemsatapa liasü.

Iba mapang NAAC Peer Team-i HoDs aser department züngsemtem, College staff, IQAC Coordinator, BoG züngsem, Nagaland University aser Higher Education (Nagaland) nungi teshimtet nisungtem, kaketshir, tsürabur aser Alumni tem den senden balala mena liasü.

Mezüng anogo ya sobaliba sentong tajung ka agia tembang aser tananü parnoki NSS, NCC, Waste Management system, Canaan Hands, Water harvesting unit

amala club aser inyaksangshi asadanga liasü.

Iba sülen tatem kuma senden ka College ketdangtsür aser kaketshirtem den mena Peer Team-i ajitetba tem lematepa liasü.

Tetsükdaktsü jenti liaka College-i akok tashi tajungtiba nung inyakba atema parnoki tenüngsang agütsü aser tang ama maparen inyaka ora, parnok 3rd Cycle semdangba mapang temelenshi tulu angutsü imlar, ta shia liasü.

Er. Moa Aier, President and Chairman, BoG C-Edge College ajanga 2nd Cycle assessment and accreditation takok ngua agitettsü asoshi anibelem mesasai inyaker nem tenüngsang agüja liasü.

Senden tatem Chairman, Prof. Sharma-i college principal nem Confidential Peer Team Report amokja liasü.

## Face of Nagaland Season 5 finalists tem photoshoot session agi



Face of Nagaland Season 5 indang finalists tem den Nova Stellam nungi ketdangtsürtem Lake Shilloi, Dimapur nung Honibarnü photoshoot session alidang tangokba noksa ka yangi angur.

**Dimapur, Rongchii/April 16 (TYO):** Nova Stellam ajanga Face of Nagaland 2023 indang hospitality partner Lake Shilloi den lungjemer Face of Nagaland Season 5 finalists 14 den photoshoot session ka Lake Shilloi nung April 15,

2023 nü agia liasü. Face of Nagaland Season 5 ya taküm küm tatemlen Dimapur nung agitsü sentong lir.

Iba photoshoot session nung aben-süoshi ya Beautiology aser Hitobo

Clothing ajanga sponsor asü, kong Face of Nagaland official makeup artist Esther Rongmei, official choreographer Sanjeev Tamang aser official photographer Bovi Sumi nung temi shilem agia liasü.

## All Nagaland Taxi Association Mkg ajanga sangdonger

**Mokokchung, 16 April (TYO):** All Nagaland Taxi Association Mokokchung office nung April 20th - 22nd, 2023, anepdang 10:00 ako nungi nikong 3:00 ako tashi - Driver ID Card, Membership, Token, New Registration aser Ownership mapatem inyaktsü, ta ANTAM tir - K. Tongpangkoba Pongen aser Pongen nati sangdong ka ajanga metetdaksüogo.

Temalen agüja alibatem meshidaki Taxi nung passenger anir senzütsü, temesepba chia jemer passenger anir senzütsü

mesüra temesepba chiyungtsü bener senzütsü khenyongi memelar, shirnoki aibelendir, temzüngi melaba ama temerenshi alitsü, ta ANTAM sangdong nungsa nenshia metetdaksü.

Iba dak alaka Private gari Hire mesüra passenger bener senzüba metetra, temzüngi melaba ama tapet temerenshi alitsü. Nüngdak balala adokdang nüburtemi iba number - 9612292004 (President), 9402017004 (Secretary) nung tongteprateptsü asoshi ANTAM ketdangpurisa mepishia metetdaksü.

## Mokokchung nung pensioner dang metetdaksür

**Dimapur, Rongchii/April 16 (TYO):** Deputy Commissioner, Mokokchung, Shashank Pratap Singh, IAS ajanga Mokokchung Hq indang pensioner (Life/Family) ajak dang sangdong ka nung, Chief Minister's Health Insurance Scheme (CMHIS) atema card agizüktsü asoshi Office of the Chief Medical Officer, Mokokchung nung Operators tem April 17, 2023 nü nungi tenzüka office mapang

ajurutetsü, ta ashi. Portal nung register sür lira, pensioners/temelen arur temi card agizüktsü atema Aadhaar Card, Family ID sayutsüla.

Family ID ya meyangui lira, pensioner temi Pensioner Payment Order (PPO), Aadhaar card aser Aadhaar card sen sendaktepa aliba registered Sim Card bener tsüngdong arutsüla, ta sangdong ajangasa ashi.

## Assam Rifles temi Peren district nung sentong balala ayongzük



**Dimapur, Rongchii/April 16 (TYO):** HQ IGAR (N) kübok Assam Rifles temi April 15, 2023 nü Peren district kübok Ngwalwa yimdak jana-reja awareness ka agüja liasü.

Assam Rifles temi yimtsüng nung lanurtem aser yimtsüng nung alirtem ajurua Waste Management and Disposal indang shisatsü agüja liasü.

Sorkari jana-reja tebilemtsü nungi takok angutsü asoshi nükjidong yur meranga inyakba indang yimdaklir aser lanurtem dang sayua liasü.

Parnok dang jana takong aser tai ketdangtsüba indang sayu aser temeket tesemtem müreka ayuba ajanga tashidak ajemdaksüba aser pei juri sasep nung süngtong atemba ajanga tajangzük anguba, fossil fuels ajema amshitsüba, carbon footprint ajemdaksütsü mechi senzüsempogba nung yimya melenshiba indang angazükdaksü.

Iba sentong nung yimdaklir nisung 18 shi arua shilem agia liasü.

Maneni Assam Rifles temi

Peren district kübok tesem balala nungi tetsürtem asoshi awareness campaign ka April 15, 2023 nü ayongzükba liasü.

Tetsür nem temeden aser tashi agütsütsü aser loktiliba nung tebilemtsü balala ajurudang takum nung telemtetba balala agitsü asoshi melatsü atema parnoki awareness ya agütsü.

Yimdaklir dang sorkar indang scheme aser sentong balala ajanga rongsenketzung aser takum alitsü atema terenlok balala agütsüba indang rateta ashi aser shisaliok nung tetsür nem maongba balala agütsüba indanga lemsatap.

Iba mapang parnoki tetsürtemi state balala nung shishilempaba tsütsü takok ngua inyaktetba tatishitsü amshia jembia liasü.

Maneni iba sentong nung Armed Forces nung maongka balala aliba aser Sainik School aser National Defence Academy nung azüngtsü asoshi scheme balala indanga awajema jembia liasü. Iba sentong nung yimdaklir 44 dena liasü.

# India nung coronavirus agi teshirangdakpur 57,542 kumogo

New Delhi, Rongchii/April 16 (Agencies): India nung ano maneni coronavirus tashidak teimba-teimba puteta tang teshirangdakpur 57,542 kumogo.

Tesüiba ghonda 24 tsungda linük nung ano nisung 10,093 dak coronavirus tashidak putetogo aser iba tashidak agi shiranger 23 süogo, ta Amongnü Union Health Ministry-i metetdaksü.

Tang tashi nung linük nung iba tashidak agi shiranger 5,31,114 süogo.

Tesüiba anogo ka tsungda Delhi nung coronavirus agi shiranger nisung pongu asü, Chhattisgarh aser Rajasthan na nung nisung asemsem asü, Karnataka aser Maharashtra na

nung nisung anana asü aser Haryana, Odisha, Tamil Nadu, Uttarakhand shia nung nisung kaka asü; Kerala nunga nisung pezü asü.

Tang linük nung anogo shia coronavirus positive putetba shilem 5.61 kumogo aser hopta shia positive putetba shilem 4.78 kumogo.

Tang tashi nung linük nung nisung 4,48,18,115 dak coronavirus putetogo aser iba nungjagi taneptsü angur 4,42,29,459 lir, ta Health Ministry-isa metetdaksü.

Linük nung coronavirus vaccination tenzükba sülen tang tashi nung coronavirus vaccine dose crore 220.66 agütsüogo, ta health ministry indang website nung shia lir.

## Uttar Pradesh ya ozüing maliba state ka kumogo: CPI(M)



April 15, 2023 aonung Prayagraj (Uttar Pradesh) nung Samajwadi Party lenir, Atiq Ahmad aser par adianu, Ashraf na police-i hospital kai anir aoba mapang tangokba noksa nung angur.

Lucknow, April 16 (Agencies): Honibar aonung Prayagraj nung Samajwadi Party lenir, Atiq Ahmad aser par adianu na police-i hospital kati anir aoba mapang nung nisung kari tena kasetba sülen Amongnü CPI(M)-i, Uttar Pradesh ya ozüing maliba state ka kumogo, ta aitsü.

Amongnü CPI(M)-i sangdong ka ajanga, police ket nung lia aser osangbenertem-a lia Atiq Ahmad aser pa adianu, Ashraf na kasetba ya ajanga Uttar Pradesh ya ozüing khenyongi maliba state ka ta sayur, ta metetdaksü.

"Police aika lia tebur ana kasetba ya ajanga iba asalentong nung ketdangsertem densema aliba sayur. Tiyazü rara nung nisung tepsetba tatalokba aika lia tang ya atalokba ya tanga kecha masü saka ozüing alema tepsetba lir," ta parnokisa metetdaksü.

"Iba ya Adityanath-i aniba sorkar tashimaitba agi lir," ta CPI(M)-i ashi.

Honibar aonung Ahmad aser par adianu, Khalid Azeem (Ashraf) na Prayagraj nung aliba medical college ka nung temang tendangtsü atema police-i anir aoba mapang nung osangbenertem den tejembidak mapang nung nisung asemi osangbenertem ama sayua tejak

chiteper tena dak injang khalokja khaset. Iba tatalokba bushisüngdangtsü atema Amongnü Uttar Pradesh sorkari züngsem asemi akümba judicial commission ka tentetogo.

Commission nung tongtiji retired high court judge, Arvind Kumar Tripathi asütsü aser züngsem anaji retired judge Brijesh Kumar Soni aser taoba mapang DGP, Subesh Kumar Singh na asütsü, ta Amongnü Prayagraj nung ketdangsertemi metetdaksü.

Ano külen tanga osang ka nung Prayagraj nung Commissioner of Police, Ramit Sharma-i, Atiq Ahmed aser Ashraf na khaseter nisung asemprongla puogo, ta metetdaksü.

Par asempronglai osangbenertem ama sayutsü atema microphone aser camera bena liasü.

Police-i asüngdangyaba mapang nung parnok, "Atiq-Ashraf telok meshi-meshia samatsütsü aser onok nungtugu akümtsü atema onoki Atiq Ahmed aser par adianu Ashraf na tepsettsü tebilemba liasü," ta ashi.

Ahmad'er jabaso, Asad-a April 13 nü Jhansi nung khaseta liasü aser Amongnü nikongdang ang tasümgang rema liasü.



April 16, 2023 nü Rajghat, New Delhi nung Delhi BJP lenirtemi longkak aita Delhi excise policy ken o dak sendakba nung Delhi Chief Minister, Arvind Kejriwal dang menden nungi anentsü akhangba mapang tangokba noksa nung angur.

## Rajema maliba ajanga India nung nütsüing kanga tali renloker

New Delhi, April 16 (Agencies): India-i alima nung nütsüing teimba aliba linük, China ajangtetsüsa aliba mapang ka nung mongintemi, India nung nisung aikati tanur magitsü tasa balala rajema maliba aser rongsenkettsüing dak sendakba lenlatem ajanga linük nung nütsüing kanga tali renloker, ta metetdaksü.

National Family Health Survey report ajanga ashiba agi, tanur raksaa indokba ya talisa jila/yimitem nung kanga bulua ataloker (shilem 4) aser yimsüngtem nungbo iba shilemji 2.5 dang lir. School mazünger tetsür shilem 1.9-i tanur raksaa indok aser küm 10-11 school azünger tetsür shilem 3.5-i tanur raksaa indok.

Population Foundation of India nung Executive Director, Poonam Muttreja-i, linük ajak atema nütsüing ainba ajemtsü atema tanur magitsü tasa balala amshitsüla, aser ibaji ataloktsü atema family planning den reproductive health services jenjang ajungkettsüla, ta ashi.

2015 kum study ka ajanga ashiba agi, küm shia India nung tanur million 15.6 raksaa indoker aser shilem 95 bo public health

Taküm January ita nung India nung nütsüing crore 140 jungogo aser kobi meli China nung nütsüing den teimba akümtsü.

Karibo India-i China nung nütsüing ajangteto ta bilemer, ajisüaka official census magi tashibo ibaji mejangjatsü.

Population Foundation of India nung Executive Director, Poonam Muttreja-i, linük ajak atema nütsüing ainba ajemtsü atema tanur magitsü tasa balala amshitsüla, aser ibaji ataloktsü atema family planning den reproductive health services jenjang ajungkettsüla, ta ashi.

2015 kum study ka ajanga ashiba agi, küm shia India nung tanur million 15.6 raksaa indoker aser shilem 95 bo public health

facilities nung masü saka private facilities nung indoker.

1971 kum Medical Termination of Pregnancy Act agizükba sülen nungi India nung tanur raksaa indokbaji ozüing alema masü.

Yaküm Supreme Court-i tanur raksaa indoktsü atema kibong makümer tetsürtem densema tetsür ajak nem temeden agüja liasü.

Transform Rural India Foundation nung Public Health & Nutrition nung tongti, Shyamal Santra-i, "Nisung ajak nem reproductive healthcare services tajung agütsütsüla; item rongnung tanur mabentsü mozü aser parnokki dang melungra tanur raksatsüba services agütsütsüla," ta ashi.

## Karnataka nung Congress party sorkar arutsü: Rahul Gandhi

New Delhi/Kolar, April 16 (Agencies): Congress lenir, Rahul Gandhi-i, taruba Karnataka assembly election nung par party-i takok angutsü aser sorkar tasenbai election mapang nangzükbatem mezüngbuba cabinet senden nungsa agizüktsü, ta metetdaksü.

Karnataka assembly election atema Congress party-i nangzükbatemji- ita shia kibong ajak nem electric light bill unit 200 angati agütsütsü, kibong nung tetsüti shia nem ita shia sen 2,000 agütsütsü, ita shia BPL kibongtem nung züngsem shia nem jang seret 10, graduate ser mapa mengui alir shia nem ita shia sen 3,000 aser diploma

agir alir shia nem küm ana tashi ita shia sen 1,500 agütsütsü nangzük.

Karnataka kübok Kolar district nung 'Jai Bharat Rally' nung jembidang Rahul Gandhi-i, "Item schemes ya mezüngbuba cabinet senden nung agizüka mapa akümtsü," ta metetdaksü.

Paisa Karnataka nung Congress lenirtem dang, "Ato kilonser Narendra Modi-i Adani nem sen crore meyirjang aika agütsütetra onoki sensaker aser tetsürtem nem sen agütsütetsü, ta linük nüburtem dang sangdongang," ta metetdaksü.

Rahul Gandhi-i, "Nai (Modi) melungsoa Adani yaritetra, onoki (Congress) melungsoa

sensakertem yaritsü, mapa mangur lanurtem aser tetsürtem yaritsü. Nai nü mapa inyangang aser onoki onok mapa inyakttsü," ta ashi.

Karnataka nung Basavaraj Bommai-i aniba BJP sorkar aija pai, contractors aser nija school temi sorkar nem "shilem 40 commission" agütsütsüsa akümer aser sub-inspectors shimba maparen nunga ochimashi lir, ta ashi.

Paisa, contractors' association-i shidi ka ajanga Ato kilonser dang "shilem 40 commission" agiba indang metetdaksü, ajisüaka pai ola madok; iba tetezü Karnataka nung ochimashi lir ta nangzükba lir, ta metetdaksü.



April 16, 2023 nü Kharghar nung Union Home Minister Amit Shah, Maharashtra Chief Minister Eknath Shinde aser deputy CM Devendra Fadnavis nungeri Dattatraya Narayan Dharmadhikari (abelen nungi tanabuba) nem Maharashtra Bhushan Award agütsügang tangokba noksa nung angur.



## TIR YIMYIM YIMOBILEM (EDITORIAL)

DIMAPUR TENTONÜ, RONGCHII (APRIL) 17, 2023

### Alu yimdi arung

**A**senok ajak ya aluyimer chir aser semchirse nurtem lir, anungji alu ayimtsübaji asenok senmang aser asenok sobaliba lir. Tanü asenoki shitakba asen tsürabur sobaliba senmang toktsür tangari inyakba mapatem dang inyaksü bilemba aser jangraba agi asenoki mapa aika nung temoatsü aser tajangzük keta meinyaktetter. Ibaji dang masü, aluyimba nung dang nisung taküm nendaka lir, anungji alu meimra itai atusangjia aya agi itai metutetsü aser IAS officer-sangjia tebok tazungbo office-i moutettsü. Atangji, asenok ajak aluyimer akümtsü ta masü saka alima maparen tapu ajak nung asenok rongnung tulurtema aser tilar tema alitsüla. Ajisüaka, alu medeni asenok taküm melitetsü ta asüba nungdakji asenoki metettsüla. Asenoki meblem danger dang ashi, Tsüngremi asenok aluyimer asütsü atema moatsüba kuli kaji asenok nem lezmüksüba ali aser arem ya lir. Tangarbo, alu yimner saka ali maka, anungji takar den külemi sentepa ayimer. Panok tia denji asenok medemdang dangbo asenok ajak ya takar kechiyong asenok ajak ya ali kiburtem lir. Iba temoatsüji reprangteta asenok tazungertema aser mazungertema pei pei yari aser tayokdak akaba chiyongtsü aser osettem indang bilemdanga yimtsür yimer, medemer aser züngatsür züngapur ayongteper alu ayim tenzüksübaji tang ya mapang shitak asütsü. Tanü putu nungbo alu ta asüba ya tsüklu, menti lu, züngi lu, manü lu, mersü lu, konger lu, somomo lu, mamazü lu, ponglashi lu, süngo lu, coffe lu, süngmok lu, azüngken lu, süngjang lu, süngdong lu, süngküm lu aser aonsutsü lu dang masü saka ak, an, patak, nabong, nashi, jang, sü aser ango metsüba mapatem ajak ya aluyimba mapatem lir. Item mapatem indangji kodang bilemdangdir, item ajakji asenoki inyaktettsüba mapatem lir. Item mapatemji jangratemtsüka, kodang item alutem rongnung ka shimteta asenoki inyak tenzükdir, anogo aoa memetet tepela nung dang alitsü aser temang arakzüka khenkhenbo anü nema pudaktsüli ta asentzü alua inyakba agi temang pongbapongbaa kümer anema alitsü. Iba jagi asenok nem Independent agütsütsü. Idangjibo, asenoki election mapang polling day nunga alui mao kidang amongtsübajia sasaa bilemstsü. Tsüngremi anü aser tsünglu mapang shitak nung shitak shitak yokra aser süngku, ozü aser yipru mopong nungi alu nung tsünüsenpongtsütem kümzükra aser tashidak wara nungi asenoki metsüba shirurutemji kümzükra, aluyimba yabo küm ka nung takar akümtsüba mapa lir, anungji tanabuba küm nungibo arogo nunga tershilem, temoatsü aser tenüngsang tenla agir magima arutsü, anungji tenzükertem ita sena atutsü aser mission mapatema tuluba inyakloka aotsü. Aji oda, küm pongububa nung kodang election arudir, aluyimertem longjemer sen saruteptsü aser iba senji yimten tenla kümer parnokiang candidate shima MLA aser MP adokdaktsütsü. Anungji, item MLA aser MP-tem jagi aluyimertem aluyimba mapatem nung nungdakba nung tali temulung agüja sentong yanglutsü. Iba mapangjibo government-ji aluyimertem meyong asütsü. Iba amaji aluyimertemi pei lima, pei yimten aser pei arogo takar kümdaktsütsü. Idangjibo, aluyimer jala jabasotem kaketreju balala nung government scholarship magii ano alu tajungba ayimtsü aser alu nungi züsentetbatem agi chiyongtsü tazü aser tamen balala renemer alima kintem dang ayoktsü asoshi Agriculture, Veterinary Science, Food Processing, Engineering aser Business Management indang shisaliok bushitsü aser peisasa alu nungi züsentetba agi ano tachitsü aser tagitsü küma yangludak industry tapu balala lapokyonga aotsü. Idangjibo, Arab aser Europe takar limatem meyong sen asen kidangi arutsü, kechiyong asen lu nung züsentetbatem par limai aotsü. Ibai aonung pongmangba pongmang ka masü saka asenoki tanü inyakra asüng asangsang nung ataloktsüba nükla lir. Tanübo parnokang timtatemba, anungji government nung alirtem mapaji light shitak yoktsü, lenmang yanglutsütsü aser ashi auer malitsüsa alima shitak anüktsüba aser kokra tayokdak bushitsüba mapatem lezmüksüdi aser asenokbo aluji ayim tenzükdi.

## OLEMSABANG

### NAGA NUNGER KHRISTAN-TEM SAKSALEMA AMANGTSÜBA MAPANG KATI MENEPOGO

~ L. Kika Pongener.

Tanü putu nung asenok Khristan-tem kanga dang saksalema amangtsüba mapang kati menepogo. Aiben asenok Khristan-temi kanga junga meshisadangi mamangertemi benshiba mapatem tajung amai bilema ajizüka benshir. Item mapatemji mapabo tajung asütsü akok, saka kodang arok-aroka bilemdangdir, item mapa tajung jagi asenok Khristan taküm ka memeteti mashileni anitsü. Mapang tatsüka sua ogo, India nungger yimsüsur nungtuko nisung ka asüba (Dead), pa temang arongba mitsü/aut (Ashes) asen lima-ia bener aruba indang kanga bulua jembiba angashi. Khen ashitsübo, yimsüsur nungtuko nisung senmang/temoatsü asen lima-ia lezmüka bener aru ta ashitsü akok. Ano tip külen arokaroka shisadanga, aji asen sobaliba dak maketba aser asen tamangba yimsü den mapetba mapa ka lir. Ano benjong-bentsü sentong kar nung 'Military Personel' kar nem asen nisung kari 'Rakhi' mesüloktsüba indanga kanga bulua jembiba angashi. Hindu nungger sobaliba aser tamangba yimsü nung 'adianu o aianu' tsüngda temeim tesentaktep temaitsü, tetsür-i pei adianu sosem tebur nem teben nung 'Rakhi' mesüloktsür. Anungji ajia khen ashitsübo par sasep nungbo mapa tajung lir. Ano tip külen arok-aroka shisadanga, aji asen sobaliba dak maketba aser asen tamangba yimsü den mapetba mapa ka lir. Aji oda, item mesükba mapatemji tila-teri amai, saka item mapatem jagi memeteti Khristan ka limapur/mamangertem sobaliba aser tamangba yimsü sulen anidaker asütsü aser mekümdanga iba yimsü-yimpong nemji moksepdaktsütsü.

Ano Hindu nungger benjong 'Holi' rong nuloktsütepa saiba benjong nung, asen Naga nungger aiur asangur aser kijung lanurtem karibo tzüma-longmar tembartem den külemi rong nuloktsütepa benjong amunger, ajioda, iba ama benshibaji par sobaliba aser tamangba yimsü-yimpong benshir ta metettsüla. Asenoki zübazüba-a iba ama mapa benshiba jagi par sobaliba aser tamangba yimsü-yimpong sulen anidaker aser tanem-tanemi iba yimsü-yimpong nemji asenok moksepdaktsütsü. Ano Hindu nunggeri 'Dewali' benjong nung 'Kaket Bomb' kanga pokteper, kechiyong ibaji par sobaliba aser tamangba yimsü dak aketba tongtipang mapa ka asütsü. Asenok Khristan-temia iba mapaji tajung ka amai ajizüka benshir, aser Christmas & New Year benjong nung 'Kaket Bomb' kanga pokteper. Asenoki kanga junga meshisadanger dang ashi, iba mapa ya-a asen sobaliba dak maketba aser tamangba yimsü den mapetba mapa ka lir. Khristan tamangba yimsü nungbo Christmas & New Year benjongji tekülem sentep lia, sarasadema, ken tena, Tsüngrem tushia, külema, sungjem-sungjema dang amunger. Hindu nungger ama asaperangtepa Bomb poktepa benjong mamunger. Asenoki iba ama benshibaji tila-teri ka dang ta zübazüba-a bilemstsü akok...Saka tanem-tanemi asenok limapur yimsü-yimpong den meyoktepa anidaka aor ta metettsüla. Anungji Sannukertemi anir toklang tenzükertemi item mapa ya mebenshitsü atema benjong mapang atongdang tekümdangtsü, laishiba nungi tesayuba agüja pulpit nungi nendak-nendaka sayutsüngitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Chuchuyimlang Baptist Arogonung Deacon tem Training agiogo



**Chuchuyimlang, April 16 (TYO):** ABAM Church & Mission ajanga ayonga maneni ABAM Zone 3 & 4 Arogotem nung aliba Deacon tem asoshi Deacon training April 14 & 15, 2023 anogotem nung Chuchuyimlang Baptist Arogonung kanga temoatsü ngua agiogo, ta ABAM Executive Secretary, Rev. Dr. Mar Pongener-i sangdong ka nung

metetdaksü. Arogo 38 aser Fellowship ana nungi Deacon tem parnok 181 arua iba training nung aden. Training mapang shisalen sayurtem aser onüktem yamai liasü- 1. Rev. Dr. Mar Pongener, Executive Secretary, ABAM, ajanga Tanü Mungdang aser Lim Arogo onük jembi, Rev. Dr. Temsü S.

Pastor Alempang BA ajanga Baptist Arogo Yimsüsüba, Arogo aser Yimten Tesendaktep aser Tepila onük jembi aser Rev. L. Yapang Mollier Secretsry, Church & Mission ABAM ajanga Baptist Distinctive onük jembia liasü. Maneni iba sentong agiyonga aodang Tsüngrem taochi ajanga temoatsü nung aniangma ta sarasademer.

# India nung Khristantem reshikangshir ta asübaji tiyazü: Centre

**April 16, 2023:** India nung Khristantem reshikangshir, ta asübaji tiyazü, aser ibaji ajanga bendanglen linük tenüing menüksür, ta Centre sorkari Supreme Court nem metetdaksü.

inyakba tatalokba 597 liasü, ta metetdakja liasü.

Parnokisa, 2021 küm kija nunga India nung Khristantem anema inyakba tatalokba 500 dak tema liasü aser Khristantem atema tamajungtiba kümji iba kümji liasü, ta metetdakja liasü.

Ajisüaka Centre sorkari Khristantem anema inyaker ta asüba osangji tai, kechiyong item ama tatalokba teimbaka tiyazü mesüra tai ratetba lir, ta shia Supreme Court dang Khristantemi agütsüba temepishiba ken oji agientsüla, ta metetdaksü.

Yaküm September 1 nü Supreme Court-i India kübok state 8 dang Khristantem anema inyakba police reports, bushisüngdangba report, aibelenertem apuba aser aibelenertem anema court nung benokba ken otem osang tejangja Supreme Court nem agüjang, ta tuyua liasü.

Court-isa temepishiba ken o agütsür Khristantem danga, temepishiba ken o nung shia aliba tatalokbatem osangji tejangja hopta pezü tsüngda Solicitor General, Tushar Mehta indang office nem agüjang, ta tuyua liasü.

Centre sorkar dang state tem nungi item osangji tejangja bendena court nem agüjang ta tuyu, ajisüaka temepishiba ken o benokertemi India tenüing menüksür, ta sorkari aitsü.

Mehta-i court dang, "Bendanglen linük noksa yamaji sayur. Iba tetezü public dang Khristantem lendong nung lir ta sangdonger. Iba ya tim masü," ta ashi.

Temepishiba ken o agütsürtem atema o jembitsürtemi Centre sorkar report ji asadangba sülen

India nung Khristantem reshikangshiba nokdangtsü atema mepishiba ken o angadangba mapang nung sorkari court nem iba osangji metetdaksü.

April 13, 2023 nü court nung sorkar tenüing nung jembidang Solicitor General, Tushar Mehta-i, temepishiba ken o agütsürtemi ashiba osangtemji shidak masü, ta ashi.

Affidavit ka ajanga Mehta-i, "Temepishiba ken o agütsürtemi, Khristantem anema inyakba tatalokba 500 shi liasü ta ashir. Temepishiba ken o agütsürtemi ashiba tatalokbatemji kiyongertem tsüngda raraba dang lir, kiyongertem rongnungji Khristan densema alitsüa akok. Tesülenbo item ken oji parnoki bentetogo. Temepishiba ken o agütsürtemi ashiba tatalokbatemji shidak masü," ta ashi.

Chief Justice D. Y. Chandrachud-i aniba bench kati iba ken o angdanga liasü.

2021 küm Bangalore nung Archbishop, Peter Machado den National Solidarity Forum aser Evangelical Fellowship of India senteper Supreme Court dang Khristantem anema inyakba, tekülem kitem raksatsüba aser Arogo meyong kiojentem amakba nokdangtsü atema tetuyuba agüjang, ta temepishiba ken o agüja liasü.

United Christian Forum report nung ajemdaker parnoki Supreme Court dang, 2022 küm India nung Khristantem anema

telangzüba agütsütsü. Iba atemaji court-i parnok nem hopta asem mapang agütsüogo.

Osangbener den jembidang Arogo lenir kati, Khristantem anema inyakba tatalokba teimbaka atema benokba ken o police-i magizüker mesüra onok anema-ang meyiper ken o benoker, ta metetdaksü.

Temepishiba ken o agütsürtem rongnung A.C Michael-i, "Onoki temepishiba ken o agütsüba shidi nungji state 22 nung Khristantem anema inyakba osang tejangja shia lir. Ajisüaka Supreme Court-i state ti- Bihar, Haryana, Chhattisgarh, Jharkhand, Odisha, Karnataka, Madhya Pradesh aser Uttar Pradesh danga Khristantem anema inyakba tatalokba 20 indang osang agüjang ta tuyuogo," ta metetdakja liasü.

Nütsüng billion 1.3 aliba linük nung Khristan nütsüng shilem 2.3 dang lir aser Hindu nungner nütsüngbo shilem 80 dak tema lir.

# ANOGO ABEN TSÜNGREM DEN

## Shidakba Temeshi

"O Kibubaji temeshi sobutsü sobur külemang" (t.9). Tsüngremi Pa nübur temeshi sūdaksüner. Tejen Lai ibai lephsia aiben amshi. Aser tenyar Peteri pa shiti nung zülu (1Peter 1:16). Iba tetezü pillar, mejaja aser tejangja aliba.

Tebu Tsüngrem, Techir Tsüngrem aser Tanela Temeshi asenok taküm temeshi lidaktsütsü asoshi külemi mapa inyaker. Asenok temeshi lidaktsütsü asoshi asen menen atema Yisu Kangki nung asü. Asenok dak Tanela Temeshi lia Pa ain agi asenok temeshi alitsü ajungshir. Tsüngrem O i asenok temeshiba nung aintsü asoshi yarir. Yisui Tebu dang ashi, "Ne ochi agi parnok meshitetjang; Ne O ochi lir" (Yn. 17:17).

Shidakba temeshiji tebur tajung lir; tiyazü temeshibaji tebur majung. Farisee temeshibaji tiyazü temeshi- pei sasa yangluba temeshi. Shidakba temeshiji Yisu, aser Pai nisung pua aru. Fariseetemi parnokji maginü. Tanela tejangtemji- temeim, tepela, yimjung, taremezük aser tesünep- taküm tobur jungdaktsür.

Shidakba temeshibaji tobur tajung, aser iba tobur tajungji tekülem nungi adoker. Nai shiba külemer pa mesüka na akümer ta nai metetter ma? Ne Tsüngremji merumeruba Tsüngrem süra na merumerua akümtsü. Ne Tsüngremji tobur mejungra naa tebur majungtsü. Shibai sen külemer paji tekuru asütsü. Shibai jangratema külemer, paji tanük asütsü. Saka shibai ochi aser taküm aliba Tsüngrem külemer pa/la ji tobur tajung asütsü- tali, tali Yisu mesüka akümtsü.

Na temeshi taküm alitsü asoshi Tsüngremi ne nem nungdak ajak agütsür. Pa o i na sayudakjang aser Tanela Temeshii na anidakjang. Na Yisu mesüka akümtsüsa liang.

# Myanmar nung Baptist pastor ka küm 6 tepuokdak ayutsü

**April 16, 2023:** Myanmar nung aliba court kati taoba mapang Kachin Baptist Convention nung Tir, Hkalam Samson küm 6 tepuokdak ayutsü obendang agütsüogo.

ta tai tonglokba pa pua liasü.

CSW Senior Analyst for East Asia, Benedict Rogers-i, "Rev. Dr. Samson ya Khristan pastor ka aser ochi temeden, meimchir temeden aser yimjung atema tasü itta ola adoker lenir ka. Pa anema obendang agütsüba ya tim masü," ta ashi.

Myanmar sepaitemi yaküm December ita nung pastor Samson apuba sülen US sorkari Samson chioktsü takhangba agütsü, ajisüaka pa küm 6 tepuokdak ayutsü obendang ang agütsüogo.

"Myanmar sepaitemi nüburtem anema inyakba anema pai tasü itta ola adokba atema pa tepuokdak ayur," ta paisa metetdaksü.

Myitkyina nung aliba court kati Unlawful Association Act, Penal Code aser Terrorism Act kübok Rev. Samson aitsüogo, ta Christian Solidarity Worldwide (CSW)-i metetdaksü.

Taküm February ita nung U.S. State Department otongdar, Ned Price-i Myanmar sepaitemi Samson apuba atema aija liasü.

Samson ya tang Kachin National Consultative Assembly nung Chairman inyaker. Pai lisapur telungpur telok ajuru aser parnok den tekülem sentong agi,

Yaküm February ita nungi tenzüka Bodhbar (April 12, 2023) tashi nung Myanmar nung nisung 3,200 shi tepsetogo aser nisung 21,300 dak tema puogo.



Ao Baptist Arogo Mungdang kübok Arogo aser Fellowship ajak nung April 16 nü ABAM Children Sunday sentep sentong kaogo. Khensa Baptist Arogo nunga ABAM Children Sunday sentep sentong akadang tila tanurtemi Tsüngrem tenüngsang ken tena shilem agiba noksa nung angur.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Polongpolonger**

(n) kanga tepolong (roundish)

\* Nisung karbo tejak polongpolonger angur.

**Pomeküttsü**

(n) po küpbangba oset ( lid of pot)

\*Teti chipo aonpo pomeküttsü agi küpbanger ayutsüla.

**OLONG PAITEP # 6487**

1				2				3		4
5		6								
						7				
8										
										9
		10				11				
				12				13		
14										
						15				
16										

**TIPLÉN**

- 2. Auonungchiyongsü asenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

**LANGTSÜNGLEN**

- 1. Lenmang
- 2. Aor kidong ka tenüing
- 3. Tenarong maten
- 4. A \_\_\_ g
- 6. Mopung apodoka
- ola adokdaksüba
- 9. Tonglipang tagitsü
- 10. Menungra bilem
- 11. Aiür
- 13. S \_\_\_ k
- 14. T \_\_\_ r

**OLONG PAITEP # 6486 TELANGZÜBA**

**TIPLÉN :**

- 1. Yiar, 3. Tesola, 7. Yimra, 8. Tangar,
- 9. Peria, 10. Tanur, 11. Tasen,
- 13. Lemjem, 15. Tambu, 16. Khuret,
- 17. Sang.

**LANGTSÜNGLEN :**

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

**KHEN SHISADANGDI**

**ALOKBAI MASHILEN BILEMBA TANGANG ANGATETER :**

**Alokba** : Hai! Ushers tem, nenok mapa shidak meinyaker.

**Ushers** : Koda asü, koba mapa shidak meinyak.

**Alokba** : Asenok sentepi VIP tem & Officertem amala arudang, nenoki menden tejaklen mendaktsütsüba ato? Kechiba tesülen, aser kima mendaktsür? Aji agi nenok ushers tem mapa shidak meinyakba sayur ati.

**Ushers** : Oh Alokba! Tsüngrem külemdak tilar tular, kecha tebendang mali, Aor küm 150 tema amanga arur, na laishiba kanga junga zügang. Tsüngrem külemdak, aser Tsüngremer wadang nung tilar tular kasa dang.

**Alokba** : Ayaaah ah! Ni kanga mashi malu bilemogo, ushers tem dang tai tongloktsütsü ni kecha temeden mali. Ni mashilen bilemogo. Sorry, Sorry, Ushers tem, nenok yamai timtema inyakba ni kanga mezüngmeshiogo... Tanü nungi ni nenok moatsür. Alokba dang tai tokangma.

**Ushers** : It's oky.....

- Aienla Ao

**Nandini Gupta-i Femina Miss India 2023 takok korang angu**



**Imphal, April 16, 2023**

(Agencies): Rajasthan nungi arishi küm 19 tain Nandini Gupta-i Femina Miss India 2023 takok korang nguogo.

Honibarnü Manipur yimtiba Imphal nung tetoktepba alidang Delhi tsür Shreya Punja-i tanabuba jenjang aser Manipur tsür Thounaojam Strela Luwang-i tasembuba jenjang takoktem angu.

India tesem balala nungi tetokteper 30 rongnungi par aseme temaba jenjang takoktem ngutetgo. Iba tetoktepba ya Manipur Tourism ajanga agi aser ORRA Fine Jewellery ajanga teyari agütsü.

Taküm tetoktepba nung makeup partner Colorbar Made for Magic liasü aser Rajnigandha Pearls ajanga yaritep.

Manipur kübok Khuman Lampak Indoor Stadium nung 59 buba Femina Miss India 2023 grand finale agiogo aser iba ya Northeast nung mezüngbuba state lir.

Iba sentong nung Bollywood actor Kartik Aaryan aser Ananya Panday nati shilem balala agia liasü.

Maneni Sini Shetty aser Manasa Varanasi na dena tesüiba Femina Miss India title holders-ia shilem balala agiogo.

Taküm tetendangertemji Femina Miss India Universe 2002 & Mentor Neha Dhupia, boxing icon Laishram Sarita Devi, star choreographer Terence Lewis aser ace designers Rocky S o Namrata Joshipura nungger liasü.

"Khuman Lampak Indoor Stadium, Imphal nung 59 buba Femina Miss India 2023 indang grand finale takok ngua agiba atema kanga pelar. Manipur, the Jewel of India ajanga linük aser alima nung nübortem nem tagütsütsü aika lir" ta chief minister N Biren Singh-i metetdaksü.

**AAP züngemtemi Kejriwal pusema Guwahati nung lungkak ait**

**Guwahati, April 16, 2023**

(Agencies): CBI-i AAP tanishir aser Delhi Chief Minister Arvind Kejriwal jaokba anema April 16 nü Assam nung Aam Aadmi Party (AAP) züngemtemi lungkak aitogo.

AAP züngsem aikati Guwahati yimdong nung aser ano linük kübok tesem balala nung Kejriwal pusema lungkak ait.

Prime Minister Narendra Modi-i tashiyim inyakba

magizüker ya AAP züngemtemi yimyim ayima lungkak ait.

"Onoki BJP ajanga mapa meshitak inyakba indang jembira CBI-i onok aputsü. Aam Aadmi Party-i Guwahati nung alirtem den Prime Minister Modi ajanga tashiyim inyakba anema noktaksü" ta AAP-i metetdaksü.

Deobarnü Kejriwal-i Central Bureau of Investigation (CBI) office tsüngdangi ao. Delhi liquor policy ken o dak sendakba nung

pa CBI dangi ao.

"Ni amaliteptsü aser ochishia langzütsü" ta CBI headquarters-i maodang Kejriwal-i osangbener dang ashi.

"Nenoki onok dak tashiyim mapa koma inyaknür ar inyakang saka nenoko onok menokdangtetsü" ta pai BJP aija ashi.

"BJP-i CBI dang ni aputsü tetuyuba agütsü" ta Kejriwal-i taoba mapang shiogo.

**Assam CM Sarma-i Kaziranga National Park semdang**

**Guwahati, April 16, 2023**

(Agencies): Assam Chief Minister Himanta Biswa Sarma-i Deobarnü Kaziranga National Park (KNP) semdang.

"Ni tanü park semdang aser tawa shikarirtemi güntok ka tepsetba tesemtem semdangtem. Tarutsü nung ibala mapa

noktangtsüba indang security maparen ni repringshim" ta CM Sarma-i osangbener dang ashi.

Taküm March ita Kaziranga National Park indang Bagori Range nung güntok tasümgang ka angu.

Küm pezü sülen Assam nung güntok tepsetgo. Tesüiba güntok

khasetbaji 2018 küm liasü aser iba sülen Bagori, Burhapahar range nung güntok shikariba ka danga mataloki aruogo.

Assam sorkari güntok shikariba anema mapa tesashi inyaka arur aser güntok kümzüka ayutsüba atema mapa balala inyaker.



Assam police-i Karimganj district nung ganja (cannabis) seret 1420 apuba sülen agiba noksa ka angur. Tripura den arrtsü anasa aou abenba truck gari ka nung ganja apu. Ganjaji Tripura yimtiba Agartala nungi Karimganj adena Uttar Pradesh kübok Bareilly-i bener aodang apu. Assam police-i truck gari anishir Deepak Kumar apu aser pa ya Bihar nungger lir.

### Sudan army aser paramilitary tsungta tashi raktep dang civilian 56 süogo

**Khartoum, Rongchii/April 16 (Agencies):** Sudan indang army aser paramilitary tsungta tashi agi raktep dang linük anakshija civilian 50 dak tema asüba osang lir.

Sepai telok ana ya tir aliba ki, state TV aser army headquarters mechi raradang linük yimtiba, Khartoum nung alirtem injang matsung dang jenshia senzür.

Civilian 17 densema yimti nung nisung 25 süogo, ta doctor tem tentet kati ashi.

Civilian nem yimsü südaktsütsü asoshi tashi agütsütsü aliba dak sendakba nung mepetmesü adoka rara tenzüük.

Army aser par den rarar Rapid Support Forces (RSF), telok anaprongi Khartoum nung airport aser danga tongtipang tesemtem agiogo ta ashi, kong Honibar aonung tepiyong khatapa liasü.

Khartoum nung metenloka aliba Omdurman aser anasa Bhari tesemtem nung Deobarnep injang-bomb tesashi ola angashiogo. Temerem tzüyim aliba Port Sudan yimti nunga khataper, ta tenük kuli alirtemi shia liasü.

Army temi ashiba agi, jets tem amshia RSF alidak amaker aser linük indang air forces ajanga Honibar aonung nüburtem dang kilung nung alitsü ashi aser iba mapang parnoki paramilitary inyaksangshi tayimtsü amshia ladanga liasü.

Linük nung yimti aser region balala nung civilian 56 tepsetogo aser ano mitkar ter dak tema süogo aser kar mozüki balala nung anepalua liasü, ta Sudanese doctors' committee ka ajanga ashi.

Ajak agi nisung 595 yirua lir, ta parnoki ashi.

Linük anüolen Kabkabiya nung mitkar aliba tesem nung RSF aser armed forces tsungta khatepba mapang tepetzük

jenjang nung alir nem chiyongsü agütsüba UN tentet World Food Programme (WFP) nung inyaker asem khaset.

2021 küm October ita mitkar temi tashiyim amshia sorkar atsüngdokba sülen Sudan nung sepai tanishir temi yimsü süa arur.

Tang raraba ya Gen Abdel Fattah al-Burhan tashi angaba army unit tem aser Sudan indang deputy leader Mohamed Hamdan Dagalo-i anir aliba RSF tsungta lir.

Army aliba tesem ajunga mamokbang tashi maneni raratsü, ta Dagalo-i ashir.

Külen Sudan indang armed forces temi paramilitary RSF ya manentsü tashi jembishinü malitsü ashir.

Khartoum nung nüburtem jena oa tesem balala nung atsükokdang yimti nung mokozü tanak adoka aliba noksa nguogo.

Yimtung nung armoured vehicles tem lir aser Khartoum airport nung civilian indang tayimtsü ka nung mi jangrua liasü, ta osangbener temi ashir. Saudi airline Saudia-i par indang Airbus ka nung injang khaloktsü ta shiogo.

Tayimtsü aika Khartoum-i aoba anena lir aser kidanger Chad linüki Sudan den arütsü shibanga lir.

United Kingdom, United States, European Union, China aser Russia linük temi iba rara tangsa anenang ta ajungshir. UN secretary general-i Gen Burhan aser Gen Dagalo den jembioigo aser tenaprong dang azüdokshi tembangtsü ajungshia liasü.

Honibarnü RSF temi airport asem, army tekolakbar ki aser tir aliba ki amokbanga lir ta ashi, saka Gen Burhan-i osangbener den jembidang aji tiazi ta ashir.

State TV station nunga khatepba osangtem liasü aser tenük kuli alirtemi iba tesem ya

RSF keti aitogo ta ashi.

RSF temi Khartoum south tsütsü par camp ka amak ta shia liasü. Aser Honibar nikongdang yimti north-west tsütsü RSF aliba tesemtem nung army temi tayimtsü amshia amakba osang lir.

RSF züngsem temi army camp tem nung amaker aser military headquarter rakzüksü meranger ta army temi ashi.

"Tanen makai rarar aser army temi linük kumzüka ayutsü asoshi pei mapa inyaker," ta army odongtar Brig Gen Nabil Abdallah-i shia liasü.

Sovereign Council ka ajanga mitkar tanishir temi Sudan nung yimsü asür. Yangji Gen Burhan ya tir aser Gen Dagalo ya tatong tir lir.

Civilian-i aniba sorkar ka tentetsü sentong yangluba nung RSF tem army nung anioktsü asoshi mapang latetba nungi mangatetep adok. RSF temi küm ter tashi atsülangner, saka army temi küm ana tsungta item ajakji inyaksüla ta ashir.

### MENUNGRA BILEMTETER



Lt. Mr. Arenungba (Mongsenyimti)  
Aso - 20-03-1952 Asü - 17-04-22

Nai onok toktsür orr tanü anogo küm ka ajunger, saka onoki na mamadokteter aser menungrasete sarasadema amunger.

Nü temeim aser taremsük shisatsü tajung agi sayütsüngi tajung agütsüba mamar. Na meliaka onok molungjang nung teti lirako.

~ Temeim Chirnürtem, Adianü aser Kinungertem.

### METETDAKTSÜR

Directorate of Women Resource Development, Kohima ajanga metetdaksüba ama Destitute Women Beneficiaries tem ajaki Aadhaar Card aser Co-operative bank Account Xerox copy kaka 30th April 2023 tashi nung Watsü Mungdang Office tongtsütsü metetdaksür.

Sd/-  
President  
Watsü Mungdang

Sd/-  
Micro Finance Committee  
Watsü Mungdang

### South Korea-i North Korea indang rong ka mintok

**Seoul, Rongchii/April 16 (Agencies):** Linük ana tsungda tzüyim nung mangatetep aliba arrtsü adena aitba atema South Korea indang military-i kümdangshitsü atema injang khalokja North Korea nunger indang rong ka mintok.

South Korean Joint Chiefs of Staff (JCS)-i Deobarnü ashiba agi, parnoki North Korea indang patrol rong ka Honibarnü 11:00 ako shi nung Northern Limit Line (NLL) adena aitba sülen kümdangshidaksütsü atema injang khatok aser meyipa aotsü asoshi osang agüja liasü.

"NLL nung North Korea indang patrol rongtemi inyakyim nung aibelenba aser onok rongshitsü merangba nokdangtsü atema onoki tsükchirtem kanga kümdanga

asadangdar aser onok military rara asoshi kanga junga renemer lir," ta JCS-i kasa sangdong ajanga metetdaksü.

Operation mapang South Korea indang patrol rong ka tsüngsang majungba ajanga China nunger indang ango apuba rong ka den tsüktep, ajisiüka lendong tulu matalok aser South Korea nunger crew kar tera yirua liasü," ta JCS-i shisem.

Hokolbarnü solid-fuel intercontinental ballistic missile ka tendangba densema hopta ishika tsungda Pyongyang-i military inyakyim aika benoka inyaksangshia aliba mapang ka nung North Korea nunger patrol rong kati arrtsü adena inyaksangshiba osang metetdaksüogo.

Mongintemi ashiba agi solid-fuel intercontinental ballistic missile tasenba ya tekümdangtsü kangabo magütsü dang khatettsü.

1990s nungi Pyongyang-i NLL ya mishidak ta shia arudar aser ashiba agi iba arrtsü ya anüolentiplen talangka asepzüka lur alitsü tim. Iba arrtsü ya 1950 nungi 53 tashi Korea linük ana raraba tembangba sülen yanglua liasü.

Taoba küm October ita Korea linük ana tsünga anüolen tzüyim nung tekümdangtsü injang khatoktepa liasü. Tzüyim nung arrtsü aden inyaksangshiba atema linük anapronglai kati ka dang tai tongloktsütepa liasü. Iba tesem nung linük ana tsungda aiben mangatetep adoka arudar.

South Korea aser United States nati March ita nungi tenzüka military exercise balala ayongzüka agiba sülen Pyongyang military tashi

amshitsü ta amaokmerenogo. Parnoki item exercise tem ya parnok amaktsü atema renemshiba ka lir ta shia arudar.

North Korea lenir Kim Jong Un-i iba hopta South Korea aser US nati jenjang agiba telangzüba agütsütsü asoshi raratsü renemshia military tashi akangshitsü asoshi tetuyuba agütsüogo.

Seoul aser Washington nati ashiba agi, parnoki military drill balala ayongzüka agiba ya defence atema aser Pyongyang-i parnok amokmerenba nokdangtsü atema lir.

South Korea nunger ketdangsurtemi ashiba agi, arrtsü adena inter-Korean hotlines ajanga North Korea den tongteprateptsü meranga arudar saka hopta ka shi parnok den tongtepratep mesüteter aser iba ajanga asaa parnoki S Korea rongshitsü meranger ama repranteter, kechiyong tzüyim nung arrtsü nung linük ana ajungbena ajurutepa mangatetep adokba nung jenboa alitsü atema item channel tem ya amshir.

North Korea-i yaküm aser taküm na tsungda missile tapu balala aika tendangogo. Parnoki tzi telung nung amshiba drone tasen ka sayaogo. Kasa mapang nung alima kintemi parnok nuclear yanglutsü atema renemshir asütsü akok ta temulung melemi bilema arudar.

Taoba US tir Trump aser Kim nung sensaksem tanabuba tamakok anguba sülen denuclearization dak sendakba nung ken o bangdaka lir.

Maneni alim kin balalai North nem tenokdangba agütsür aliba ajanga parnok rongsenketzung nung kanga timtema arudar.

### Ita asem tsungta Pakistan nung nisung 358 süogo

**Islamabad, Rongchii/April 16 (Agencies):** Pakistan nung taküm küm tenzüker ita asem tsungta telungpur temi amakba aser kiralongrar anema raraba mapang nisung 854 tepsetogo mesüra yiruogo, ta study ka ajanga sayur.

Centre for Research and Security Studies ajanga osang ka sangdongba nung ashiba agi, Pakistan nung January aser March 2023 tsungta kiralongrari amakba aser kiralongrar anema raraba 219 nung nisung 358 asüba aser nisung 496 yiruba züluoka lir.

Ajisiüka mezüng ita asem nung asü-amaba aser yiruba ya 2022 küm tepiyong nung atalokba tasadang ka lir.

Nisung timba Khyber Pakhtunkhwa nung asü aser iba sülen Balochistan (64), aser Sindh, Punjab aser Islamabad

nung alitsü.

Osang ajangasa ashiba agi, taküm January ita security forces asüba ya küm ter tsungta timtiba alitsü. Ozüng alema tenteta aliba TTP ajanga lendong 22 agütsüba nung asü-amaba 107 liasü.

Ajisiüka taküm timba asüba ya yimya tasen ka masü, kechiaser taoba küma yamaji ataloka liasü, kong December ita asüba ama linük nung küm ter tsungta matalok.

January ita nisung 111 asüba ya ita ka nung security personnel timtiba asüba rongnung jenjang tanabuba nung lir, kechiaser 2014 küm July ita nisung 118 asü.

January 30 nü linük northwest tsütsü Peshawar yimti kübok police mosque ka nung bomb ka poka sepai 84 asü, aser iba lendong ya

mapang ka TTP den sendaktepa aliba telok kati tenüng agia liasü.

Ita asem nung azüdokshi dak sendakba nung civilian tem asüba ya shilem tasadang ka dak tema agi ajema 63 liasü aser küm ka tejakdang 136 liasü.

"Tebilemstü tulutibaji security aser sorkar ketdangsur asüba ya lir, koba taoba küm first quarter nung 88 aliba taküm first quarter nung 167 lir," ta osang ajanga ashi.

Pakistan Taliban ta ajaba Tehreek-e-Taliban Pakistan (TTP) teloki amakba tali akumer aser tangbo parnoki civilian dak masü saka security ketdangsur dak tenük yoker.

Pakistani Taliban ya Afghan Taliban den mesükteper, koba Hibatullah Akhundzada-i anir lir.

## Man United nungi asayar Martinez Season tepeyong masayatetsü



**Rongchii/April 16, 2023 (Agencies):** Manchester United nung defence asayar Lisandro Martinez yirur season tepeyong masayatetsüsa akümba den Raphael Varane-a yirur hopta ishika masayatetsüsa akümba ajanga tibelemtsü tulu adokogo.

Asayar anaprongla ya Brehostibarnü Old Trafford nung Europa League quarter-final mezüngbuba leg Sevilla den goal 2-2 agi draw asüba asaya nung yirua liasü.

Martinez, shibai December ita Argentina team nungi World Cup koka liasü, pa asaya atemtsü lia tetsü tachichilen teloktep yirua ground nungi anir tuguatok.

Kasa asaya nung United nungi first-choice centre-back Varane-a asaya mezüngbuba shilem tembangba sülen yirur masayatetsüsa aküm aser pa melena aitsang Harry Maguire-i mapang apuloktsür asayaba mapang own goal ka idakja liasü.

Manager Erik ten Hag-i Hokolbarnü osangbenertem

nem osang kecha magütsütet ajisüaka mapa tatsüka lir club-i asayar ana yiruba osang tejangja agüja liasü.

"Lisandro Martinez tetsüng nung metatarsal teret yiruba sülen season tepeyong masayatetsü," ta United-i sangdong ka ajanga metetdaksü.

"Ajisüaka Argentina nunger asayar ya taruba season tenzükbaba mapang nungbo taneptsü ngur alitsü imlar," ta club-isa ashi.

"Lisandro indang defensive partner Raphael Varane-a kasa asaya nung yiruba ajanga half-time sülen melen aser hopta ishikabo masayatetsü imlar," ta kasa sangdong ajanga metetdaksü.

Ten Hag-i tanga defender tem liaka Martinez aser Varane na centre-back nung asayadakja arudar aser United pur iba season temaba jenjang nung tembangtsü meranga asayaba mapang tena masayatetsüsa akümba ajanga tetsükdaksü tulu adokogo.

Ten Hga-i aniba team yagi

February ita League Cup kokogo aser parnok Champions League atema qualify asütsü atema meranga asayadar.

United pur Deobarnü Nottingham Forest den asayaago aser iba sülen Europa League quarter-final tanabuba led Sevilla, Spain nung oa asayatsü lir.

Sevilla den asayaba asaya nung suspend sür aliba ajanga Bruno Fernandes masayatet aser club captain Harry Maguire-a Brighton den FA Cup semi-final asayatsü aliba asaya nung masayatsü atema tenokdangba agütsüogo.

Maguire masayatetsüsa akümba ya tibelemtsü ka lir, kechiyong United atema centre-back joko Maguire aser Victor Lindelof na dang anunga lir.

Defender tem rongnung left-back Luke Shaw central defence asayadaksü akok. Pa tawa yiruba ajanga masayatet aruogo.

Maneni United nungi asayar Marcus Rashford, Garnacho aser Donny van de Beek nunger ajak yirur lir.

## Azerbaijan-i EWC nungi weightlifter tem anin

**Rongchii/April 16, 2023 (Agencies):** Azerbaijan-i sangdong ka ajanga ashiba agi, parnok tsükchir Armenia yimtiba nung ayongzüka asaya aliba international weightlifting tetoktepba ka nungi linük nungi asayartem aninogo, ta metetdaksü.

Wako rongtoktsüba ken o ka dak ajemdaker iba jenjang agiogo.

Linük ana ya Azerbaijan kübok Armenia nunger timba aliba Nagorno-Karabakh tesem dak sendakba nung mapang talangka mangatettep adoka arudar. Linük ana ya iba tesem dak sendakba nung 1990s nung khen aser 2020 küm ta anaben raraogo.

Hokolbarnü Yerevan nung European Weightlifting Championships lapokba sentong indang video ka ajanga nisung ka sabangi asema tur

Azerbaijan indang wako amer ket nungi wako rakzüker mi tsükloktsüba nguogo.

Azerbaijan indang ministry of youth and sports aser National Olympic Committee na longjemer sangdong ka ajanga ashiba agi, sentong nung tatalokba sülen parnoki asayartem kidangi meyipa anir arutsü atema telemtetba agiogo.

"Armenia nung tesempa agi sünger aliba mapang, security tsütsü ken o mejangja aser Azerbaijan nunger asayartem psychological pressure aliba ajanga tokteptsü atema tamakoktsü kümogo," ta parnoki ashi.

"Saisapong nung yimden yimsüsüba meyokteptsüba ya khenyongi agizüktsü makoktsü," ta shia parnoki European Weightlifting Federation dang Armenia nem tenokdangba

agütsütsü mepeshia asüngdangogo.

Azerbaijan indang foreign ministry-ia iba tatalokba aitsüogo aser Armenia dang aibelena alir nem tapet temerenshi agütsütsü khangogo.

Local media-i ashiba agi, Armenia police-i wako rongtoktsüsang; designer Aram Nikolyan mapang tatsüka atema sota ayu aser pa okatsüri ashiba agi pa dak tai kecha metongloktsüi pa chiokogo.

Armenia indang ministry of education, science, culture and sports-i ashiba agi, asayartem iba tetoktepba nung shilem agitsü atema kecha tetsükdaksü maliasü.

"Asayamung lapokba sentong nung kechi atalokogo iba ajanga asayartem tekümzükbaba dak sendakba nung mekongshitsü," ta ministry-i ashi.

## USA team Billie Jean King Cup Finals-i iogo

**Rongchii/April 16, 2023 (Agencies):** Jessica Pegula-i teyari tulu agüja U.S. team Billie Jean King Cup finals-i iogo.

Delray Beach, Florida nung Austria team 4-0 agi akokba asaya nung Pegula aser Coco Gauff napronglai tena tata asaya koka liasü.

Honibarnü Pegula-i 6-1, 6-3 agi Austria tsür Julia Grabher koka liasü.

Iba takok anguba sülen America team 3-0 agi tejakdang aküm aser iba sülen Katy McNally aser Gauff nati tarep asaya nung Sinja Kraus aser Melanie Klaffner 6-1, 6-4 agi koka liasü. Pegula-isa Hokolbarnü kija asaya kokogo aser world No. 6 asayar Gauff-ia kija asaya nung Grabher koka liasü.

Final-i aiba sülen USA team asoshi otsüsütsüsa iba asayamung 19benbuba akoktsü asoshi maongka lir.

France, Spain, Czech Republic, Kazakhstan,

Germany, aser Italy nunger ajak iba asayamung finals atema qualify süogo, koba November 7 nungi 12 tashi asayatsü. Item linüktem ya reigning champion Switzerland, 2022 runner-up Australia aser wild-card agizükba team ka den tokteptsü. Iba asayamung atema ano qualifier madem lir.

Kazakhstan dak alia tanungba linüktem ajak yagi iba asayamung kokogo, ajisüaka parnok asoshi takümogo iba asayamung akoktsü maongka lir, kechiyong parnoki 3-1 agi Poland akokba asaya nung reigning Wimbledon champion Elena Rybakina-i la asaya anaprongla koka liasü aser iba asaya akokba sülen parnok küm anabuba atonga iba asayamung atema qualify süogo.

Kasa mapang nung France-i 3-1 agi Britain kokogo aser Czech Republic-ia 3-1 agi Ukraine madak takok angu aser Spain-i Mexico 3-1 agi aser Germany-i 3-1 agi Brazil kokogo.

## Immobile gari tsükokba lendong nung densema yiru



**Rongchii/April 16, 2023 (Agencies):** Lazio-i sangdong ka ajanga, Italy nunger forward Ciro Immobile gari tsükokba lendong ka nung densema sülen tongtoret aser tesaret yiru lir, ta metetdaksü.

Rome nung gari tsükokba lendong nung densema tesaret aser tongtoret yiruba sülen Lazio forward Ciro Immobile tang mozükidang temang asadanga mapang ka lir, ta club sangdong ka ajanga Deobarnü metetdaksü.

Italy nung media sangdong balala ajanga ashiba agi, Immobile shibai Hokolbarnü Lazio-i goal 3-0 agi Spezia akokba asaya nung goal idakja liasü, pa ya Rome nung pai ania aliba gari tram ka den tsüktepba sülen yirua liasü.

"Tanü gari tsüktepba lendong ka atalokba sülen football asayar Ciro Immobile tongtoret

aser tesaret yirua liasü," ta Lazio-i ashi.

"Pa temang tang tashibo junga lir. Football asaya ya Rome nung Agostino Gemelli IRCCS University Polyclinic kübok emergency medicine department nung asadanga yua lir," ta club-isa metetdaksü.

Sky Sport Italy-i ashiba agi, Immobile ya par jala ana den gari ka nung senzüa aliba mapang iba lendong ajuru. Arishi küm 33 tain asayar yagi police dang ashiba agi tram yagi red light aliba merprangi lenmang süitsü meranga liasü. Gari ana ya tsüktepba sülen tram nung mena alir densema nisung tashi temang asadangtsü atema mozükidang anir oa liasü.

Immobile-i taküm Serie A nung goal 10 idaktsür lir aser parnok tang Napoli sülen tanabuba jenjang nung lir.

## BILEMDANGANG

"Pei jangraba mapa inyakra temulung masü malitsü."